



ШЫН

НИИТИЛЕЛ-ПОЛИТИКТИГ СОЛУН

1925 чылдың
август 31-де
үнүп эгелээн

№ 41 (16652)

2003 чылдың
АПРЕЛЬ 15,
вторник

Ат салган шагы 22.15
Садар өртээ 3 рубль.

Моол делегация

КАДЫ АЖЫЛДАЖЫЛГА УЛАМ КАЛБАРАР



Тыва Республиканың Чазаа биле Моолдун Баян-Ульгий аймааның администрациязының аразында кызыгаар чоогунуң садыг-экономика, эртем-техника болгаш культура талазы-биле кады ажылдажылга дугайында Дугуржулгага ат салышкыны Кызылга, Чазак Бажыңының хуралдаар залында дүүн, апрель 14-те, болуп эрткен.

Ийи таланың Дугуржулгазынга ат салырының байырлыг езулалын Тыва Республиканың Чазааның Даргазы Ш.Д. Ооржак эге сөзү-биле ажиткан. Тыва Республика-биле кады ажылдажылганы калбартыры, ханыладыры-биле ажыл-албан кылып чедип келген Моолдун Баян-Ульгий аймааның губернатору дээрги Х.Баделханга удурткан делегацияның кежигүннеринге Чазактың мурнундан изиг байырны ол чедирген. Моолдун аймактары-биле Тыва Республиканың

аразында кады ажылдажылганы калбартыр талазы-биле Кызылда Моолдун Чингине төлээзи дээрги Д.Пунцаг түннелдиг ажылды чорудуп турарын демдеглээн. Дугуржулгага ат салырының байырлыг езулалына киржип турар Тыва Республиканың Чазак кежигүннерин Шериг-оол Дизижилович таныштырган.

Моолдун Баян-Ульгий аймааның губернатору дээрги Х.Баделхан Тыва Республиканың Чазаа эки уткуп, хүлээп алганы дээш өөрүп четтиргенин

чугаазынга илереткен. Аймактың социал-экономиктиг хөгжүлдесин допчузу-биле таныштырган. Тыва Республиканың бүгү чурттакчы чонунга, Чазаанга Баян-Ульгий аймактың чонунуң база аймактың делегациязының өмүнээзинден байырны чедиргеш, ажыл-ижинге, амыдыралына чедишкннерни, чаагай кадыкшылды ол күзээн. Дугуржулгага ат салырының байырлыг езулалына киржип турар делегацияның кежигүннерин дээрги Х.Баделхан таныштырган.

Кады ажылдажылга дугайында Дугуржулгага ТР-ниң Чазааның өмүнээзинден Тыва Республиканың Чазак Даргазы Ш.Д. Ооржак, Моолдун Баян-Ульгий аймааның администрациязының өмүнээзинден

аймактың губернатору дээрги Х.Баделхан ат салганнар.

Тыва Республиканың Чазааның Даргазы Ш.Д. Ооржак Дугуржулгага ат салган соонда допчу чүве чугаалаан. Тыва Республиканың Чазаа биле Баян-Ульгий аймактың администрациязының аразында садыг-экономика, эртем-техника болгаш культура талазы-биле кады ажылдажылганы калбартып, улам ханыладыры-биле ат салган чугула документиде айтыкан хем-чеглерни күүседир дээш боттуп ажылдарны ийи тала бир демниг чорудары кайзынга-даа ажыктыын ол айтыкан. Ол ыш-каш кызыгаар айтырыын чогумчалыг шийтпирлээринче кичээнгейни Шериг-оол Дизижилович угландырган.

Кызылда Моолдун Чингине төлээзи дээрги Д.Пунцаг, Тыва Республиканың Чазак Даргазының бирги оралакчызының хүлээлгезин күүседип турар А.В.Брокерт болгаш ТР-ниң Чазааның база Баян-Ульгий аймааның администрациязының хары-салгалыг ажылдакчылары Дугуржулгага ат салырының байырлыг езулалына киришкеннер. Оон аңгыда Мөнгүн-Тайга кожуун чагыргазының даргазы А.К. Донгак баштаан кожуунуң төлээлери база киришкен.

Таан-оол ХЕРТЕК.

ЧУРУКТАРДА: Дугуржулгага ат салышкынының үезинде. Василий Балчый-оолдун тырттырган чуруктары.



УЛАМЧЫЛАВЫШААН

Эрткен неделяда Кызыл хоорайга субботниктер уламчылаан. Апрель 11-де Кызылдың 40 ажыг организациязы боттарының быжыглаттынган девискээрлеринге ажылдааннар. Субботникке 24 автотехника хаара туттунган, 500 кижжи киришкен.

Бо субботниктиң кол сорулгазы — хоорайның девискээринде "чайгаар бүткен" бок-күзүрүм овааларны аштап-арыглаары болган. Пассажирлер автотранспорт бүдүрүлгезинин, "Тываэнерго" акционер ниитилелдин, күрүнениң санитар-эпидемиологтуг хайгаарал төвүнүң болгаш Күш-ажыл яамызының коллективтери бо удаада эки ажылдааннар.

Юрий ДАРБАА.



СӨӨЛГҮ ШАКТА

♦ Ирактан дыңналып турар сөөлгү медээлерни езугаар алырга, ылап-ла огулуг медээлер база шоолуг эвес. Ындыг-даа болза, Багдадта автомат болгаш пулемет-биле аткылажыгышкыннар бооп турар, колдуунда хамааты чон өлүм-чидимге таваржып турар деп, дүүн дыннаткан.

♦ Саддам Хусейниң төрүттүнген хоорайы Дикритти американнар ээлеп апкан, бомбалаашкын үезинде ирак президент өлүрткен деп медээ бар. Хусейниң дузалакчызы турган генерал американнарга туттурган, ооң өчүүн езугаар алырга, Саддам Хусейн Багдадты бомбалап турда, шагда-ла өлүрткен деп медээ база бар. Кымга бүзүрээри бергедир ийин.

♦ Ооң-биле кады чүл дизе бо

хүннерде Иракта ээзи чок ээн арткан өнчү-хөреңгини оорлап, үптээр чоруктар болза-даа денди көвүдээни дүвүрелди болдуруп турар. Ындыг кижилер Кыдаттың Багдадта элчин чериниң 11 машиназын, өске-даа эт-херекселдерин когун үзе оорлап аппаратан. Россияның элчин черинге мүн-не дегбээн, ында арткан он шаа кижжи элчин черин карактап-камгалап турар. Харын-даа ук элчин чериниң чоогунда ирак хамаатылар безин россия элчин черин камгалаарына киржип турар.

♦ Сөөлгү үеде, Иракта байдал чеже-даа эки билдинмейн турар болза, ооң келир үезиниң айтырыы дүвүрелди эгелээн. Чижээ, Россияның, Францияның, Германияның күрүне Баштыңнары Санкт-Петербуртка ужурашкаш, бо айтырыгны Каттышкан Нациялар Организациязы

шиитпирлээрин чугула деп көргөн. А Ирактың келир үезиниң айтырыын чүгле АКШ болгаш Англия шийтпирлээр чүве деп, Дж. Буш медеглеп четтигипкен. Австралияга эрткен миллион кижжи киржикчилик чыскаал-митингиниң киржикчилери бо айтырыгны база-ла КНО шийтпирлээр дээрин негээн.

♦ Ирак айтырыына холбаштыр чамдык анекдоттар безин тыштып келген. Чижээ, "Сирилээн чөндөк мен бе азы делегей эргези менде бар бе? — деп, Дж. Буш бодундан боду айтырган". Буштун өг-бүлезиниң дугайында ийи фильм үнгөн. Оларны: "Буш-2", "Оглу адазы дээш" болгаш "Мелегей боорда, мелегейден дора" деп адаан. Чукча кижжи солун номчуп орган: "Ирак тараачын ланчызы-биле америк вертолетту андара адып каан. Вертолетта ок кавыны безин чок, элдептиин аа, хоочун аңчы вертолет картын камнааны ол чоор бе".

(АГЕНТИЛЕЛДЕР МЕДЭЭЛЕРИНДЕН).

